



REPUBLIKA E SHQIPËRISË
KOMISIONERI PËR TË DREJTËN E INFORMIMIT DHE MBROJTJEN E TË
DHËNAVE PERSONALE

Nr. 150/14 Prot

Tiranë, më 10.3.2016

VENDIM

Nr. 02, datë 10.3.2016

Në mbështetje të neneve 29, 30 dhe 32 të Ligjit Nr. 9887, datë 10.03.2008, " *Për Mbrojtjen e të Dhënave Personale* " i ndryshuar, Ligjit Nr. 8485, datë 12.05.1999, " *Kodi i Procedurave Administrative të Republikës së Shqipërisë* " i ndryshuar, si dhe provave të administruara në ngarkim të kontrolluesit, **klínika "Da Vinçi"**, sh.p.k.,

VËREJ SE :

Në zbatim të Urdhrit Nr.21, datë 08.02.2016 të Komisionerit për të Drejtën e Informimit dhe Mbrojtjen e të Dhënave Personale për kryerjen e hetimit administrativ, më datë 03.02.2016, filloi procedura e kontrollit administrativ pranë kontrolluesit **klínika "Da Vinçi" sh.p.k.**, me objekt kontrolli:

- Zbatimi nga ana e kontrolluesit **klínika "Da Vinçi" sh.p.k.**, i Ligjit nr. 9887, datë 10/03/2008, " *Për Mbrojtjen e të Dhënave Personale* " i ndryshuar, dhe akteve të miratuara nga Komisioneri gjatë kryerjes së aktivitetit të tij, në lidhje me masat për sigurinë e të dhënave personale, në zbatim të nenit 27 të ligjit.

Nga hetimi administrativ në vend, në datë 09.02.2016 e vazhdim, pranë kontrolluesit **klínika "Da Vinçi" sh.p.k.**, grupi i kontrollit konstatoi se:

- 1- Kontrolluesi **nuk** ka përmbushur detyrimin për të njoftuar pranë zyrës së Komisionerit në lidhje me përpunimin e të dhënave, duke rënë ndesh me nenet 21-22 të Ligjit Nr. 9887, datë 10.03.2008, " *Për Mbrojtjen e të Dhënave Personale* ", i ndryshuar. (Në datë 23. kontrolluesi ka përmbushur këtë detyrim).
- 2- Kontrolluesi, paraqiti një rregullore për mbrojtjen e të dhënave personale ku mekanizmi i pëlqimit mungonte. Në seancën dëgjimore, depozitoi rregulloren të përmirësuar, ku pëlqimi ze një vend të rëndësishëm. Gjithsesi, rregullorja nuk është në standartet e kërkuara nga Ligji Nr.9887, datë 10.03.2008, " *Për Mbrojtjen e të Dhënave Personale* "; i ndryshuar, përkufizime, të drejta dhe detyrime të palëve, dhe atyre të treta.
- 3- Kontrolluesi, **nuk** aplikon deklaratë konfidencialiteti, e cila është detyrim për çdo punëmarrës. Parë në frymën e ligjit (pika 2/dh neni 7 dhe neni 28), kontrolluesi duhet të

aplikojë deklaratën e konfidencialitetit për të gjithë punonjësit, gjë e cila do të ishte një ndër masat kryesore e cila do të garantonte privatësinë e pacientëve/klientëve të tij. Kontrolluesi, duhet të marrë masa në mënyrë që, personat që vihen në dijeni me të dhënat e përpunuara gjatë ushtrimit të funksioneve të tyre, detyrohen të ruajnë konfidencialitetin dhe besueshmërinë edhe pas përfundimit të funksionit. Çdo person që vepron nën autoritetin e kontrolluesit, nuk duhet t'i përpunojë të dhënat personale tek të cilat ka akses, pa autorizim. Në seancën dëgjimore, depozitoi kontratat e punëmarrësve, bashkëngjitur aneks kontratën tip, për konfidencialitetit.

Për shkeljet e konstatuara në vend, është mbajtur procesverbali i konstatimit, i cili u firmos nga kontrolluesi, ku dhe u shpreh:

"Pas konstatimit të inspektorëve, do të perfeksionojmë të gjithë dokumentacionin përkatës".

Në zbatim të neneve 87-88 të Ligjit Nr.8485, datë 12.05.1999, "Kodi i Procedurave Administrative të Republikës së Shqipërisë" i ndryshuar, për respektim të së drejtës për t'u dëgjuar, në datë 01.03.2016 është organizuar seanca dëgjimore me përfaqësuesin e kontrolluesit, i cili kishte rikuperuar të gjitha shkeljet e konstatuara në lidhje me gjetjet e grupit të kontrollit administrativ, përpara marrjes së vendimit përfundimtar.

Kontrolluesi-klinika "Da Vinçi" sh.p.k., u shpreh edhe me shkrim se: "Da Vinçi sh.p.k., ka marrë gjithë masat e duhura dhe ka revizionuar gjithë dokumentacionin që ka lidhje me mbrojtjen e të dhënave personale të pacientëve, me qëllim përmirësimin e mangësive të evidentuara ne procesverbalin e datës 16.02.2016".

Rezulton se, kontrolluesi pavarësisht se i ka ezauruar gjetjet e grupit të kontrollit, në kushtet e gjetura gjatë hetimit administrativ, mbetet në shkelje të Ligjit Nr. 9887, datë 10.03.2008 "Për Mbrojtjen e të Dhënave Personale" i ndryshuar. Kontrolluesi ka patur gjithë mundësinë për t'u njohur me ligjin dhe detyrimet që rrjedhin nga ky ligj, dhe aktet e tjera nënligjore.

Si përfundim, shkeljet e konstatuara gjatë hetimit administrativ në kuptim të nenit 39/1 shkronja "dh" të Ligjit Nr. 9887 datë 10.03.2008 "Për Mbrojtjen e të Dhënave Personale" i ndryshuar, përbëjnë kundërvajtje administrative dhe sanksionohen me gjobë, si më poshtë:

d) "kontrolluesit, që nuk përmbushin detyrimin për njoftim, sipas përcaktimit në nenin 21 të këtij ligji, dënohen me gjobë në vlerën 10 000 deri në 300 000 lekë.

dh) "kontrolluesit ose përpunuesit, që nuk marrin masat e sigurisë së të dhënave dhe nuk zbatojnë detyrimin për ruajtjen e konfidencialitetit, të përcaktuara përkatësisht në nenet 27 dhe 28 të këtij ligji, dënohen me nga 10 000 deri në 150 000 lekë."

Kontrolluesi, klinika "Da Vinçi" sh.p.k., në formën ligjore të aktivitetit të tij është person juridik dhe, sipas nenit 39/2 për kundërvajtjet e mësipërme, dënohet me dyfishin e gjobës së përcaktuar në pikën 1 të këtij neni.

Për zgjedhjen e masës së gjobës, zyra e Komisionerit ka parasysh faktin se shkeljet e konstatuara edhe pse të ezauruara, janë serioze, ato lidhen me sigurinë e të dhënave personale, detyrimin për njoftim si një e drejtë parësore në zbatim të ligjit, dhe parimeve bazë të mbrojtjes së të dhënave personale.

Komisioneri gjithashtu, ka parasysh faktin që kontrolluesi ka qënë në bashkëpunim serioz me grupin e kontrollit, gjatë ushtrimit të hetimit administrativ, dhe ka reaguar në mënyrë të menjëhershme.

PËR KËTO ARSYE:

Në zbatim të neneve, 21, 27, 28, 30, 31, 39/1 shkronja "b", "d" dhe "dh", 39/2, 40 dhe 41 të Ligjit Nr. 9887, datë 10.03.2008 "Për Mbrojtjen e të Dhënave Personale" i ndryshuar,

V E N D O S A :

1. Dënimin e kontrolluesit, klinika "Da Vinçi" sh.p.k., me gjobë, në vlerën **20 000 (njëzetëmijë) lekë** për shkelje të detyrimit të përcaktuar në nenin 21 të Ligjit Nr. 9887, datë 10.03.2008 "Për Mbrojtjen e të Dhënave Personale" i ndryshuar.
2. Dënimin e kontrolluesit, klinika "Da Vinçi" sh.p.k., me gjobë, në vlerën **30 000 (tridhjetëmijë) lekë** për shkelje të detyrimit të përcaktuar në nenin 27, 28 të Ligjit Nr.9887, datë 10.03.2008 "Për Mbrojtjen e të Dhënave Personale" i ndryshuar.
3. Kontrolluesi, klinika "Da Vinçi" sh.p.k., të rikuperojë shkeljet e konstatuara nga grupi i kontrollit brenda një periudhe prej 30 ditësh, ku përparësi merr rregullorja, e cila duhet të hartohet sipas standardeve të përcaktuara në aktet e Komisionerit.
4. Gjoha arkëtohet nga kundërvajtësi në Buxhetin e Shtetit, jo më vonë se 30 (tridhjetë) ditë nga komunikimi i këtij vendimi. Me kalimin e afatit të ankimit, ky vendim kthehet në titull ekzekutiv dhe ekzekutohet në mënyrë të detyrueshme nga zyra e përmbarimit.
5. Kundër këtij vendimi mund të bëhet ankim në Gjykatën Administrative të Shkallës së Parë, Tiranë, brenda 30 (tridhjetë) ditëve nga komunikimi i këtij vendimi.

Ky vendim u shpall sot në, 10.3.2016

Besnik DERVISHI

KOMISIONERI